

prout modo diximus, designandi, cui tota competeteret facultas id gubernandi.

ARTICULUS SEPTIMUS.

DE PRÆSENTIA TESTIUM.

Concilium Trid. decrevit duos vel tres necessarios fore testes, præter parochum, ut matrimonium valide iniretur, idque sapienter ne parochus deciperetur vel forsitan malæ esset fidei, et denique ut clandestinitas tutius tolleretur.

Edicta regia quatuor olim requirebant testes, sed communius docetur duos ad validitatem matrimonii etiam eo tempore requisitos fuisse. In novo Codice quatuor requiruntur, qui debent esse maiores, masculini sexus et cives Galli; sed hæc conditiones sunt pro foro civili tantum.

Cum in decreto Concilii nihil statuatur circa ætatem, sexum aliasque testium qualitates, sufficit ut adhibeantur personæ usum rationis habentes, quæ testificari valeant sponsos mutuum consensum cum debitibus circumstantiis libere sibi præstisset. Hinc consanguinei, affines, mulieres, pueri ratione prædicti et proprii sponsorum liberi, testes esse possunt.

Necesse est ut testes ad matrimonium fuerint vocati, aut saltem de illo contrahendo moneantur; ut moraliter sint præsentes, non successive, sed simul cum parocho, ut advertant quid agatur, illudque, si oportet, juridice testificari sint capaces. Unde in actu matrimonii inscribi non debent pro testibus nomina personarum quæ celebrazione non adfuerint, quia validitatem hujus conjunctionis canonice testari non possent.

Non tamen necesse est ad validitatem matrimonii ut testes verba sponsorum distincte audiant; eo ipso enim quod videant illos coram sacerdote libere sistentes et totum ritum celebrandi matrimonium sequentes, testificari possunt eos canonice fuisse conjunctos. Ita *Dens*, t. vii.

CAPUT NONUM.

DE REVALIDATIONE MATRIMONII NULLITER CONTRACTI.

Non raro accidit ut matrimonium nulliter contrahatur, vel propter inhabilitatem partium, vel propter defectum consensus, vel propter omissionem formæ a concilio Trid. præscriptæ. Matrimonium semel nullum diuturnitate temporis convalidari non potest, nisi suppleatur quod validitas ejus defuit. Hinc plures nascuntur quæstiones ad præxim attinentes et maximi momenti: igitur dicemus 1^o de agendi ratione confessarii erga eos qui matrimonium nulliter contraxerunt; 2^o de revalidatione matrimonii nullius ob inhabilitatem partium; 3^o de revalidatione matrimonii nullius ob defectum consensus; 4^o de revalidatione matrimonii nullius propter omissionem formæ a Conc. Trid. præscriptæ; deinde quintum addemus articulum de dispensationibus *in radice*.

ARTICULUS PRIMUS.

DE AGENDI RATIONE CONFESSARI ERGA EOS QUI
MATRIMONIUM NULLITER CONTRAXERUNT.

Ubi matrimonium nondum est contractum, certum est confessarium teneri admonere penitentem de impedimento existente, et absolutionem ei denegare, si advertat eum, absque legitima dispensatione, ad matrimonium nihilominus procedere velle; alioquin nullitati contractus et profanationi sacramenti aliquo modo consentire videretur. Ita generaliter theologi contra paucos, qui a monitione temperandum esse putant, si ignorantia sit invincibilis et nulla spes boni successus affulgeat, quibus assentimus, supposito quod, omnibus perpensis, res ita sit.

Si vero matrimonium jam sit contractum, caveat confessarius ne conscientiam penitentis leviter circa validitatem matrimonii ejus conturbet: primum sedulo

perpendat an de nullitate constet, nec ne; in incertitudine, magis inclinandum est ad validitatem quam ad nullitatem: nihil igitur dicendum est, nisi verum existat dubium, et prævideatur partes facile adducendas esse ad supplenda ea quæ defuerunt.

At si impedimentum certo existat, vel adest bona fides circa validitatem matrimonii, vel non: si non adsit bona fides, tunc monendus, increpandus, et a sacramentis repellendus est poenitens qui matrimonium convalidare non vult, aut a comparte discedere, aut in perfecta continencia vivere. Communiter matrimonium convalidare debet, et necessaria ad hunc finem assequendum præstare tenetur. Si vero in bona fide versetur, vel ex monitione securita prævidetur incommoda, v. g., peccatum formale ubi erat tantum materiale, impossibilitas consensum alterius obtinendi, periculum ne proles abjiciatur, ne infamia nascatur, ne fiat divortium cum fidelium scandalum et familiæ detrimento, etc., et tunc omittenda est monitio atque poenitens reliquendus est in bona fide sua: sic communiter theologi et expresse cardinalis Caprara, in Instructione circa matrimonia nulliter contracta, episcopis Galliarum, die 25 aprilis 1803 data, n. 3; vel nullum ex monitione obventurum est notabile incommodum, et tunc procul dubio facienda est monitio.

Quod si poenitens exponat se de validitate matrimonii sui dubitare, requirat confessarius quo motivo dubium istud fundetur: si verum ipsi exhibeat motivum, regulariter aperienda est veritas. Si vero falsum indicetur motivum, dicat dubium ex hac parte non esse fundatum, eumque in bona fide relinquat et cuncta matrimonii jura ei negative permittat, in hypothesi quod ex monitione gravia sequerentur incommoda, vel nulla spes emendationis affulgeat. *Dens, t. vii.*

ARTICULUS SECUNDUS.

DE REVALIDATIONE MATRIMONII OB INHABILITATEM PARTIUM NULLIUS.

Partes possunt esse inhabiles ad contrahendum, vel ob

impedimentum publicum, vel ob impedimentum occultum.

Impedimentum quod ex natura sua in foro externo probari potest, ut impedimenta consanguinitatis, affinitatis, publicæ honestatis et cognitionis spiritualis, semper judicatur publicum. Quod vero ex natura sua probari non potest, ut impedimentum ex copula illicita vel ex crimine proveniens, non reputatur publicum, nisi saltem quinque, sex aut pluribus personis innotescat: id sequitur ex dictis.

Si autem matrimonium sit nullum ob aliquod impedimentum publicum, perinde celebrandum est ac si nullo modo celebratum fuisset, scilicet, coram parocho et testibus, prius obtenta dispensatione impedimenti, nisi impedimentum per tempus desierit, v. g., defectus ætatis, ligamen; alioquin validitas ejus probari non posset et finis a concilio Tridentino intentus non obtineretur, ut patet. Aliquando tamen necesse est ut secreto iterum celebretur, si impedimentum sit ignotum.

Si vero matrimonium sit nullum propter impedimentum occultum, multo major est difficultas. 1º Cum validitas ejus in foro externo constet, necesse non est illud in forma Concil. Trid. iterare. 2º Auferendum est impedimentum per legitimam dispensationem. Si ergo tale sit impedimentum ut ab illo non dispenseatur, tunc separandi sunt sponsi saltem quoad torum, et alia ipsis non suppetit via salutis. 3º Sublato impedimento, procedendum est ad revalidationem matrimonii: vel autem impedimentum utriusque contrahenti notum est, vel uni tantum: si utriusque notum sit, uterque consensum secreto renovare debet, in statu gratiæ, propter sacramentum, et tutius est inducere sacerdotem qui nuptiale conferat benedictionem.

Si impedimentum uni tantum e contrahentibus notum sit, vel alteri sine gravi incommodo manifestari potest, vel non: in priori casu, manifestandum est, ut mutuus renovetur consensus: ita omnes. At in posteriori casu, scinduntur theologi; quidam enim dicunt necessa-

rium non esse alteram partem de nullitate prioris matrimonii conscientiam reddere, et satis esse ut pars impedimenti conscientia, eligens momentum, quantum fieri potest, in quo ipsa et alter conjux in statu gratiae sint constituti, iterum in matrimonium positive consentiat, quia consensus alterius semper moraliter perseverat. Vide *Sanchez*, disp. 36, n. 2; *Dens*, etc.

Alii vero communius requirunt ut altera pars de nullitate prioris consensus moneatur, tacita nullitatis causa; nam 1º dici non potest consensum moraliter perseverare, quia, ut actus mentis, est transitorius et diu non subsistit; 2º consensus sufficienter renovari non potest, ignota nullitate, quia ex errore proveniret; 3º quia in rescriptis S. Poenitentiariae haec clausula addi solet: *Muliere de nullitate prioris matrimonii certiorata (vel viro certiorato), sed ita caute, ut latoris delictum nunquam cognoscatur;* 4º quia ita sentiunt graviores theologi et canonistae inter quos *Bened. XIV*, Inst. 87, n. 59 et seq., et praesertim 71.

Fatendum tamen duas primas rationes hujus sententiae firmas non esse; in priori enim sententia, dicitur consensum semel datum semper perseverare donec retractetur, quod evidenter summi Pontifices admittunt ut verum, concedendo dispensationes *in radice*. Defensores autem posterioris sententiae, primam et secundam rationem allegando, quaestionem probandam manifeste supponunt: unde si S. Poenitentiaria clausulam omitteret, vel ab illa dispensaret, monitio ex gravi necessitate licite omitti posset.

Culmen difficultatis est invenire methodum alteram partem de nullitate matrimonii certiorandi, sine periculo delictum latoris manifestandi. *Bened. XIV* in citata Inst., n. 71 et seq., quatuor exponit modos, scilicet:

1º Conscius impedimenti fingat se ignoratum, deinde ostendat se suspicari ne, ob aliquam causam, matrimonium rite non fuerit celebratum, ideoque tutius esse mutuum consensum ultro praestare, ut in posterum ab omni sollicitudine animi liberentur.

2º Qui impedimentum cognoscit, testimonium novi amoris ab altero coniuge eliciat, et fateatur se paratissimum eodem testimonio se astringere, si adhuc in libertate versaretur: tunc novum consensum mutuo exprimant, et omnia in tuto collocantur.

3º Impedimenti conscientia declarat se primum matrimonio rite non consensisse, atque ideo, iudicio confessarii, oportere ut, causa internae tranquillitatis, ambo consensum renoverent; ostendat se libenter hoc factrum: si alter eamdem voluntatem manifestet, satis erit ut novus intelligatur adesse consensus.

4º Si, ob gravissimas difficultates, nullus aliis modus suppetat, tunc impedimenti conscientia accedit ad conjugem inscium impedimenti, et cum eo habeat copulam affectu conjugali: coniuge impedimentum ignorantiae, eodem amore permoto, et se devinctum putante, eo ipso consensus utriusque realis et praesens adesse censemur.

Verum Marcus Paulus Leo, celebris canonista, apud eumdem Pontificem, ibi duos priores modos prorsus insufficientes affirmat, quia coniugus impedimenti nescius in sua relinquitur ignorantia: igitur consensum vere non renovat.

Ipse *Bened. XIV* quartam rationem condemnat, propter insufficientiam, et quia peteretur copula vel ei assentiretur ante validitatem matrimonii, cum nullitatis conscientia, quod intrinsece malum est. Concludit modum in tertio loco positum solum esse admittendum, ut pote clausulae a S. Poenitentiaria apposita unice congruentem; in ea hypothesi, coniugus ignorantis de nullitate matrimonii certioratur, et tamen delictum alterius non innotescit, nec ullum admittitur mendacium.

Nihilominus notat illustris Pontifex tres modos a se rejectos plurimorum scriptorum auctoritatibus corroborari, nec condemnat confessarios qui in gravissimis difficultibus unum ex illis adhiberi praescribunt; sed consultit dispensationem *in radice*, de qua infra, sollicitare, vel ad majorem Poenitentiarium aut ad episcopum recurrere.

Nos vero, inter tot difficultates, arbitramur poeniten-

tem communiter relinquendum esse in bona fide, vel petendam esse exemptionem a clausula sacrae Pœnitentiariæ, vel dispensationem *in radice*. Attamen tertius modus nonnunquam adhiberi potest, et in casibus desperatis, ut ita dicam, obtenta dispensatione a majori Pœnitentiario, vel ab episcopo. Quartum indicamus modum ut solum possibilem, licet insufficientem in se : saltem ea ratione pœnitens in bona fide constituitur. Eum approbant *Navarrus*, *d'Argentré*, etc.

ARTICULUS TERTIUS.

DE REVALIDATIONE MATRIMONII OB DEFECTUM CONSENSUS NULLITER CONTRACTI.

Vel consensus ex utraque parte defuit, vel ex una parte tantum. Si prius, utraque pars consensum renovare tenetur. Præsentia parochi et testium minime necessaria est, nisi forte defectus consensus evaserit publicus; curandum est tamen, pro securitate sacramenti, ut adsit sacerdos qui renovationem consensus suscipiat, et benedictionem nuptialem impertiat.

Si posterius, id est, si consensus ex parte unius conjugis duntaxat defuerit, v. g., quia ille ficti, vel ex errore aut metu consensit, multi dicunt sufficere ut de novo vere et libere consentiat, altero de nullitate prioris consensus non monito; sed plures id negant, propter rationem superius expositam, videlicet, quia falsum est consensum alterius moraliter perseverare. Unde saltem tutius est utramque partem consensum renovare, atque ita respondisse *Clementem VIII*, in casu matrimonii ex metu contracti, refert *Bened. XIV*, Inst. 87, n. 69, 70 et 71.

Si autem pars altera de nullitate matrimonii, ob gravissimas causas, certiorari non posset, sufficeret, propter rationem expositam, p. 422, ut pars nullitatis conscientia consensum renovaret : sed extra necessitatem sic agere non liceret, tum ne altera pars consensum retractasset,

tum quia hic modus consensum renovandi a pluribus judicatur insufficiens.

ARTICULUS QUARTUS.

DE REDINTEGRATIONE MATRIMONII PROPTER OMISSIONEM FORMÆ A CONC. TRID. PRÆSCRIPTÆ NULLIUS.

Omissio hujusmodi formæ, seu defectus præsentia parochi aut alterius sacerdotis legitime delegati et testium, non semper reddit matrimonium nullum nec illicitum, ut constat ex dictis de matrimonii infidelium, hæreticorum, vel catholicorum, ubi decretum Conc. Trid. non fuit promulgatum, vel difficilis aut periculosus est recursus ad proprium sacerdotem catholicum.

Matrimonia infidelium ad fidem conversorum non bedicuntur : tutius est, saltem in Gallia, matrimonia hæreticorum iterare, propter rationes quas exposuimus, p. 399.

Quoad matrimonia inter catholicos, tempore perturbationis Gallicanæ, sine præsentia sacerdotis valide contracta, Pius VI statuit hortandos esse duntaxat sponsos ut, habita copia sacerdotis catholici, benedictionem nuptialem susciperent. Card. Caprara, legatus a latere, sic habet in Instructione anni 1803, n. 1 : « Moneantur sic » contrahentes de hujusmodi matrimonii validitate, et » ta ntummodo hortentur ut benedictionem nuptialem a » proprio parocco recipiant. » Eadem sequenda sunt principia ubi de matrimonii alibi similiter contractis agitur.

At si propter omissionem præsentia parochi matrimonium sit nullum, ut sunt matrimonia inter nos a restituzione rerum, civiliter tantum contracta, quid agendum est ut convalidentur?

R. Si ambo sponsi recte sint dispositi, nulla est difficultas; matrimonium ante faciem Ecclesiae, juxta morem consuetum, de novo celebrari debet. Si vero ferre nequeant banna sua proclamari et matrimonium publice celebrari, facile obtinetur ab episcopo dispensatio super bannorum proclamationibus, et licentia matrimonium

valde mane vel alia hora in ecclesia aut extra ecclesiam celebrandi, modo duo adsint testes, et provideatur ut hæc celebratio ad tollendum scandalum innotescat.

Sponsi ita civiliter coadunati, a communi habitatione separari debent, saltem per aliquod tempus, ut dolendo de peccatis suis ad suscipiendum matrimonii sacramentum se accingant : verum id sæpe obtineri nequit; idcirco omnia relinquuntur prudentiae confessarii, qui, rationibus hinc et inde perpensis, judicat quid possibile, quid suadendum et quid præcipiendum sit. Aliquando solam abstinentiam ab omnibus venereis per aliquot dies exigit, si cor sponsorum videat contritum, et separationem obtinere nequeat.

Si unus tantum recte sit dispositus, nihilominus matrimonium in ipsius gratiam celebratur, et profanatio sacramenti respectu alterius permittitur.

Imo si male dispositus in matrimonium ante faciem Ecclesiæ consentiat, ea lege ut ad confessionem sacramentalem non cogatur, etiamsi se incredulum palam ostenderet, adhuc matrimonium celebrandum esset propter alterius conjugis salutem, filiorum legitimatem et scandali cessationem.

Ulterius cardinalis Caprara progreditur, in *Instructione citata, n. 8 et seq.*, et dicit satagendum esse ut sponsus, matrimonium suum in facie Ecclesiæ convalidare renuens, « specialem procuratorem constitutus, qui ejus nomine matrimonium contrahat de more; aut saltem, expresso consensu de præsenti per epistolam directam proprio parocho, vel alteri sacerdoti, Ordinarii aut pa-rochi licentiam habenti, matrimonium renovetur. »

Hic modus matrimonium clandestinum convalidandi primo aspectu videtur singularis; est tamen doctrinæ Ecclesiæ, circa validitatem matrimonii per procuratorem celebrati, consentaneus.

Si autem una pars ad celebrationem matrimonii per media hactenus indicata faciendam nullo modo adduci queat, ad convalidationem per dispensationem *in radice* deveniendum est, quia in illa lege concedi non solet sim-

plex dispensatio, vi cuius sponsi consensum inter se privatim renovare possent.

ARTICULUS QUINTUS.

DE CONVALIDATIONE MATRIMONII PER DISPENSATIONEM IN RADICE.

Dispensatio in radice, qualem hic consideramus, quæ etiam dicitur sanatio matrimonii *in radice*, in eo consistit ut instanti quo tollitur impedimentum, matrimonium sine novo consensu fiat validum, vi dispensationis et prioris consensus perseverantis. Nam sciendum est impedimentum dupli modo matrimonium dissolvere posse, scilicet, modo resolutorio et modo suspensivo. Si impedimentum modo resolutorio matrimonium dissolveret, consensus prorsus esset destructus et absque renovatione nullum haberet effectum. Si vero impedimentum modo suspensivo matrimonium solvat, ut probabilius nunc aestimatur, tunc habendum est velut obex inter consensum utriusque sponsi, ferme sicut lignum inter adamantem et ferrum : tollatur lignum, statim ferrum et adamas sibi adhærebunt. Similiter tollatur obex inter consensum utriusque sponsi existens, et sanetur consensus coram Ecclesia vitiatus, eo ipso perficitur matrimonium perinde ac si nullum non fuisset in principio. Talis dispensatio dicitur *in radice*, quia ad ipsum matrimonii initium ascendit. Non quidem efficit ut matrimonium nulliter non fuerit contractum, sed consensum ratione impedimenti prius vitiatum sanat, et effectus nullitatis de medio tollit, ait *Bened. XIV*, de *Synodo diœces.*, lib. 13, c. 21, n. 7.

Hæc dispensatio duo importat, scilicet 1º impedimenti relaxationem, et 2º prioris consensus sanationem, id est, Ecclesia quæ consensum impedimento vitiatum non acceperat, illum adhuc perseverantem et dispensatione sanatum accipit. Cum autem timendum sit ne consensus interne fuerit revocatus, vel ne sponsi aut unus sponsorum in statu peccati mortalis constituatur, dum sacra-

mentum confertur, hinc fit non nisi in gravissimis casibus, et urgente magna causa, ait *Bened. XIV*, decreto diei 27 septembbris 1755, n. 7, et *Billuart*, ad eum recurendum esse.

Quæritur 1º an tales dispensationes concedi possint.

R. 1º. Veteres auctores minime de iis loquuntur.

2º *Sanchez*, plures citans auctores, fuse loquitur, l. 8, disp. 7, de dispensationibus *in radice* ad legitimandam prolem antea susceptam : tales dispensationes de medio tollunt defectus ex impedimento provenientes, efficiuntque ut proles eodem modo habeantur ac si matrimonium ab initio fuisse validum : sed ille auctor contendit matrimonium ipsum non convalidari, nisi consensus post dispensationem renovetur.

3º *Bened. XIV*, de hujus generis dispensationibus tractans, quæst. canonica 174, dicit communem canonistarum sententiam esse illam legitimare prolem directe quoad effectus spirituales et indirecte quoad effectus civiles, atque etiam post mortem alterutrius ex conjugibus concedi posse : non igitur de revalidatione ipsius matrimonii agit.

4º Verum in Inst. 87, n. 80, affirmat summum Pontificem a renovando consensu dispensare posse, si velit, citatque hujusmodi dispensationem a Clemente XII anno 1705 concessam : ipse aliam similem concessit decreto jam superius citato, diei 27 septembbris 1755, in quo hæc habentur : « Quæ (dispensatio) a Romanis pontificibus concedi consuevit, urgente magna causa, et quando agitur de impedimento matrimonii ortum habente, non a jure divino aut naturali, sed a jure ecclesiastico. »

5º Eamdem sententiam tueruntur *S. Ligorijs*, et plures theologi apud ipsum, l. 6, n. 4115.

6º *Cardinalis Caprara*, in Instructione jam citata, tradit, tertia parte, regulas pro convalidandis matrimoniiis per dispensationem *in radice*, deinde archiepiscopis et episcopis Galliæ concedit facultatem ad annum duraturam « dispensandi *in radice* matrimonii, perinde ac si

» contrahentes, qui ad matrimonium ineundum inhabiles fuerant et consensum illegitime praestiterunt, ab initio habiles fuissent et legitime consensum prestisserint. »

Pius VII et Pontifices maximi, ejus successores, usque nunc episcopis Cenomanensibus indulserunt eamdem facultatem vel ad annum, vel pro casibus numero determinatis ; constat ergo auctoritate summorum Pontificum et theologorum ac praxi Ecclesiæ matrimonia nulliter contracta, per dispensationem *in radice* convalidari posse.

Idem constat ratione. Probabilis est et ipsa agenda ratio Ecclesiæ ostendit consensum impedimento vitiatum, esse duntaxat suspensum, atque moraliter perseverare : hoc posito, si impedimentum tollatur et consensus vitiatus sanetur, matrimonium vi prioris consensus fit validum : porro certum est Ecclesiæ habere potestatem ab impedimento juris ecclesiastici dispensandi et consensum impedimento vitiatum, coram seipsa sanandi eumque acceptandi. Ergo.

Quæritur 2º an episcopi dispensare possint *in radice*.

R. 1º. Qui virtute Pontificalis indulti dispensant, certe *in radice* matrimonii dispensare nequeunt, nisi indulsum talum facultatem ipsis conferat ; quia, cum in eo casu sint delegati, nihil ultra delegationem facere possunt.

R. 2º. Si, ratione circumstantiarum, propria auctoritate dispensent, astimat *Baston, Concordance*, p. 229, eos etiam *in radice*, magna urgente causa, dispensare posse. Sed *Bened. XIV*, Const. *Etsi matrimonialis*, diei 27 sept. 1755, ait expresse solius esse Romani pontificis, non solum dispensationes *in radice* matrimonii indulgere, sed etiam conditiones statuere pro validitate gracie implendas.

Quæritur 3º quænam necessariæ sint conditiones ut ope dispensationis *in radice*, convalidetur matrimonium nulliter contractum.

R. Plurimæ conditions necessariæ sunt : 1º species externa matrimonii, ut ait *Bened. XIV*, de Synodo dicæces., l. 13, cap. 21, n. 7, et card. Caprara, in Instr.; quod supponit priorem consensum fuisse verum et serio da-

tum. Unde conjunctio manifeste fornicaria per dispensationem *in radice* legitimari non posset. Attamen licet matrimonium civiliter contractum sit coram Deo verus concubinatus, non reputatur conjunctio manifeste fornicaria, et per dispensationem *in radice* convalidari potest, quando contrahentes bona fide crediderunt valere in conscientia; secus, non potest. Si unus tantum fuerit mala fidei, matrimonium absolute convalidari poterit per dispensationem *in radice*, accidente novo hujus consensu.

2º Ut impedimentum sit tantum juris ecclesiastici, siquidem Ecclesia in jure divino et naturali non dispensat, nec obices tollit effectibus civilibus obstantes.

3º Ut magna urgeat necessitas, et renovatio consensus obtineri nequeat. Attamen dispensatio hujusmodi, absque tali necessitate, data a summo Pontifice re bene cognita, nihilominus valeret; non item si daretur ab episcopo vi indulti, quia episcopus non propria, sed delegata utitur potestate.

4º « Ut per indubias duorum saltem testium depositiones, aut per renuentis testimonium in scriptis exaratum, aut per ejusdem assertionem etiam ore tenus faciam, sive Ordinario, sive alteri personæ specialiter deputatae et in scriptis redigendam, constiterit non solum renuentem in consensu de præsenti permanere, sed etiam hujusmodi renuentiam ab extrinseca causa ita manare, ut nihil unquam ex ea deduci aut præsumi possit contra ipsius actualis consensus permanen- tiam. » Sunt verba Cardinalis Legati, Instruct. n. 13. Si rescriptum particulare dispensationis vel indultum concessum episcopo ad dispensandum, hujusmodi cautiones formaliter præscribat, procul dubio servandæ sunt, et probabilius sub poena nullitatis.

Si autem nihil specialiter fuerit præscriptum, cautions prædictæ plus minusve erunt servandæ, habita ratione circumstantiarum. Ad validitatem dispensationis satis erit consensus olim datum perseverare: censetur vero perseverare quoties nihil demonstrat illum fuisse revocatum.

Summa hæc cautio necessaria non esset si impedi-

mentum ab altero contrahente ignoraretur, eique manifestari non posset; sufficeret ut prudenter judicaretur illum in matrimonio putativo perseverare, et de revocando priori consensu non cogitare.

5º Si nullitas matrimonii sit occulta, ad vitanda scandalum, sanatio *in radice* facienda est secreto: si vero nullitas sit publica, sanatio perficienda est notorie, aut si qua ex causa fiat occulte, divulganda est prout spiritus sapientiæ suggesserit, ut scandalum publicum vitetur: ita adhuc card. Caprara, ibid.

6º Qui facultatem dispensandi *in radice* obtinuit, satagere debet ut sponsi in statu gratiæ constituantur eo tempore quo dispensationem applicabit, et, si possit, benedictionem nuptialem impertiet, etiamsi unus tantum adsit, quia hoc ipsomet instanti matrimonium perficitur. Qui gnarus est impedimenti, consensus renovare tenetur. Quod si renuat, nihilominus valebit dispensatio, modo consensus in initio datus non fuerit revocatus.

Si, utroque ignorantе, dispensatio *in radice* eis etiam insciis applicetur, probabile est matrimonium statim convalidari, quia obex inter duos consensus existens tollitur, et vitium consensus per sanationem aufertur.

Quoties nullitas est nota vel nosci potest in foro externo, sanatio *in radice* exprimi debet vel in registro parochiali, si prudentia permittat, vel in registro secretariatus episcopalium, vel saltem in speciali scripto, quod remittitur sponsis vel sponso qui solus nullitatem novit.

Facultas revalidandi matrimonium *in radice* a majori Pœnitentiariorum, in una e formis supra expositis, sollicitanda est.

Quamvis omnia matrimonia, ex impedimentis mere ecclesiasticis nulla, sanari possint per dispensationes *in radice*, advertendum tamen facultates a Sancta Sede episcopis concessas, semper esse limitatas non solum quoad numerum, sed etiam quoad speciem casuum, v. g., pro casibus affinitatis illicitæ et occultæ. Ideo rescriptis sedulo est attendendum.